

Porotetani i te fenua Enana

I te pae fenua Enana mā e mea iti roa te mau porotetani ia faaauhia i te rahiraa tatorita. Eere te reira huru no teie mahana, no mua mai rā, mai te haamataraa mai no te òhipa pororaa evaneria i ravehia e te mau mitionare matamua, aita te mau porotetani i faaea maoro i terā mau pae fenua. E tano atoà e parau e, no to rātou ānei iti e te atea hoi i te fenua Tahiti, ua riro te reira ei mea teimaha no te Etārētia porotetani i te tonoraa i te mau òrometua na terā mau pae. No reira, ua faaea noa teie mau taeaè e tuahine i roto i te tiāraa i te tahi aratai no rātou. E rave rahi atoà tei haere atu i roto i te haapaōraa tatorita no te mea ua faaea atu i te vahine e aore i te tāne no te reira haapaōraa. Areā tei toe mai ua faaea noa ia ei porotetani.

I teie mahana, aita atoà te mau porotetani i rahi atu, noa atu ia e rave rahi te mau taata porotetani i rātere atu i teie mau pae fenua no te rave ānei i te òhipa e aore ia no te mea ua ineine no te faatiā i te ùtuafare. E tano atoà ia parau e, te huru fānaò rii nei rātou i te mau tino òrometua, inaha e toru òrometua i teie nei e òhipa ra i te mau fenua Enana. Te haapaōhia ra te mau òhipa no te oraraa o te mau pāroita, mai te mau pureraa e tae noa atu i te mau haapiiraa faaroo, mai te tamarii, te feiā āpī e tae noa atu i te taata paari. Ua faatiā haerehia te mau farepure āpī e te vai nei ā o te fatata i te tomohia. I roto i to rātou itiraa, te faaitoito nei rātou i te fāi i to rātou faaroo ia au i te aratairaa faaroo a te Etārētia evaneria. Eita e òre e, no taua iti



Photo Daniel Margueron

no rātou ra i itoito ai rātou i te tapeà i to rātou faaroo mai tē itehia-noa-hia i roto i te mau āmuiraa taata iti o te imi i te mau rāveā atoà ia òre rātou ia moè i roto i te hoè āmuiraa rahi.

Te mau tuātiraa

I te pae no te mau tuātiraa e te tahi atu haapaōraa. Ua haama-tahia mai ia na roto i te tahi mau fāreireira, e te rave āmui nei te tahi mau aratai no terā e terā haapaōraa i te fēfuriraa pīpīria āmui no te tauturu ia rātou i roto i ta rātou faaiteraa i te hinaaro o te Atua, te faanahoraa i te tahi tapura òhipa no te tautururaa i te feiā āpī, te tupu nei te mau fāreireira i roto i te mau ruru-raa fenua. Teie rā, e mea rahi ā te òhipa o te tiā ia ravehia e fatata atu ai tātou i te hinaaro o te Fatu tei pure ia hoè ta na mau pipi e te feiā e faaroo i ta rātou ra haapiiraa.

Aita rā teie mau tuātiraa i tupu noa no te mea na te faaroo i faatupu, no te mea

atoà rā te vai ra te auraa fenua i roto i teie nūnaa o tei riro atoà ei taura paari tei taāmu te taata i te taata, e aore ia te taata i te Atua. Aita te mau Etārētia i riro na ei tumu no te hoēraa o te nūnaa na mua roa, ua riro rā ei tumu no te āmahamaha. No reira i teie mahana, e mea tiā ia riro rātou ei tumu no te hoēraa ia au i te hinaaro o te Fatu. E parau faufaa hoi teie o tē tiā ia tātou ia hiò e ia fēfuri ia hanahana te Atua.

Na roto rā i te mau peu e ravehia nei e te mau haapaōraa āpī aita ia i faaōhie i te reira tapura òhipa. Ua faarahi roa atu rā i te mau āmaha-maharaa, i te pae no te faaroo o te taata, to na oraraa ùtuafare e te oraraa vaamateinaa.

E aha tē tiā ia ravehia

Te vai mau ra te òhipa o te tiā i te mau porotetani ia rave, maoti rā, te òhiparaa no te hoēraa o te mau Etārētia mai te faatura i te

tiāraa o te taata i roto i ta na haapaōraa e i roto i to na faaroo. Ia faaitohia te Parau a te Atua i te mau huru taata atoà, rau noa atu ai ta na haapaōraa. I roto i te reira manaò, te vai ra ia te tiāturiraa e, na to te taata iteraa i te Parau a te Atua o ta na e taiò, tauāparau e e fēfuri e faatupu i te fāreireira i roto ia na e te Atua. Eiaha rā e na te haapaōraa e haafāreirei te taata i te Atua. O te reira te tahi manaò o te tiā roa ia ārohia i teie mahana, i te mea e o te tumu ia no te mau āmahamaha i roto i te nūnaa. Mai te mea, e no roto mai tātou i te hinaaro e faaāpī, oia hoi te parau no te «reformatio», tei titau i te taata ia hoi faahou i niā i te Parau a te Atua, e faaitoito anaè ia i te tapeà i te reira e ia aratai taua parau ra ia tātou i roto i ta tātou mau tapura òhipa.

Taari Maraea